


UVODNIK

Godišnjak Behram-begove medrese je stigao do svog osmog broja. Pokazatelj je to kontinuiranog i predanog napora da se sve što se radi u toku jedne školske godine predstavi u pisanom obliku. Prema već ustaljenoj praksi i metodologiji, pripremamo i izdajemo godišnjak u kontinuitetu, godinu za godinom, kako bismo na taj način sistematizirali i predstavili i uspjehe i brojne aktivnosti dok su još uvijek aktualne.

I ova *Kapija*, kao i prethodna, sastoji se iz dva dijela. U prvom su autorski radovi profesora, koji su predstavili iskustva iz nastavne prakse, istraživanja različitih pedagoških i psiholoških tema, ali i aktualne teme iz prirodnih i društvenih nauka, kao i bosanske književnosti. Ističemo rad iz islamistike, autora dr. Ahmeda Hatunića *Porodica i brak u radovima Šabana Hodžića*, te istraživanje i analizu jednog od najosjetljivijih procesa u nastavi, a to je ocjenjivanje učeničkih postignuća.

Drugi dio *Kapije* se sastoji od redovnog pregleda aktivnosti Behram-begove medrese u školskoj 2021/22. godini. Naši vrijedni učenici su postizali velike rezultate na takmičenjima koje su



organizirali Pedagoški zavod i Sportski savez Tuzlanskog kantona. Spomenut ćemo da su učenici Behram-begove medrese na kantonalnim takmičenjima osvojili 18 vodećih mjesta (1. do 3. mjesta), 1. i 2. mjesto na federalnim takmičenjima, te plasmane na državnim i međunarodnim takmičenjima. Također, prva tri mjesta su učenici osvojili na takmičenjima u organizaciji Rijaseta IZ-e u Bosni i Hercegovini, kao i na gradskim i kantonalnim sportskim takmičenjima.

Također, u okviru javne i kulturne djelatnosti škole smo imali preko 120 različitih školskih i gradskih programa, manifestacija, posjeta i drugih oblika vannastavnih aktivnosti.

Na kraju *Kapije* se nalazi i hommage profesoru latinskog jezika Halidu Suljkanoviću, koji je jedan dio svoje bogate profesorske karijere proveo i u našoj školi.

Urednik